



KEMENTERIAN SUMBER ASLI
DAN KELESTARIAN ALAM

SIARAN MEDIA

NRES LANCAR SKUAD NRES LESTARI: DEKATI RAKYAT PERKASA AGENDA KELESTARIAN

Kementerian Sumber Asli dan Kelestarian Alam (NRES) hari ini secara rasmi melancarkan Skuad NRES Lestari, sebuah pasukan sokongan strategik yang dirangka khusus untuk memperkukuh aktiviti Komunikasi, Pendidikan dan Kesedaran Awam (CEPA) tentang kelestarian terus kepada akar umbi.

Pelancaran yang disempurnakan oleh Ketua Setiausaha NRES, Datuk Dr. Ching Thoo a/l Kim ini mencerminkan komitmen jitu NRES dalam mentransformasikan gaya hidup lestari sebagai satu gerakan rakyat (*bottom-up*) demi kesejahteraan masa depan negara selaras dengan aspirasi Malaysia MADANI.

Dalam ucapan perasmiannya, beliau berkata, Skuad NRES Lestari diwujudkan sebagai platform dinamik untuk memperluas penyampaian maklumat dan pendidikan awam.

“Skuad turut bertindak sebagai ejen perubahan dalam menyebarluaskan dasar dan kempen Kementerian mengenai sifar plastik, pengurusan e-waste, pemeliharaan biodiversiti, kempen penanaman pokok dan kesedaran pengurusan tanah dan mineral. Selain, selaku perantara rakyat, ia juga sebagai duta yang memantau dan menyalurkan maklumat mengenai aktiviti pencerobohan alam sekitar kepada pihak berkuasa,” katanya.

Program ini merupakan kolaborasi antara NRES dengan rakan strategik utamanya, Bateriku (M) Sdn. Bhd. Rakan strategik lain termasuk daripada NGO's Friends of Langat River, Institusi Pengajian Tinggi (IPT) dari Universiti Putra Malaysia (UPM), Universiti Kebangsaan Malaysia (UKM), Politeknik Port Dickson dan Nilai, Masjid Al-Hasanah yang juga Rumah Ibadat Hijau (RIH), salah satu produk di bawah Malaysian Green Tech & Climate Change Corporation (MGTC) agensi di bawah NRES.

Berbeza dengan pendekatan konvensional, Skuad NRES Lestari mengutamakan komunikasi bersemuka yang lebih mesra komuniti. Skuad ini dijadualkan bergerak ke lima (5) zon utama (Tengah, Selatan, Sabah, Timur dan Utara). Bagi fasa awal bersempena bulan Ramadan ini, Skuad akan aktif di bazar-bazar Ramadan dan pasar raya bagi advokasi Kempen Hindari Plastik Sekali Guna.

Pelaksanaan program ini turut menyokong strategi besar NRES dalam menerajui transformasi ekonomi hijau negara, antaranya, pencapaian aspirasi "Net Zero Carbon" seawal 2050. Melalui aktiviti KUDAH harini, kutipan 10 kg botol plastik daripada 100 kg sisa am telah menyumbang kepada pengurangan pelepasan karbon sebanyak 25 kg CO₂e, bersamaan dengan perjalanan kereta petrol sejauh kira-kira 100 km atau penggunaan elektrik sebuah rumah selama 3 hingga 4 hari..

Ujar KSU lagi, NRES turut mengambil kesempatan ini untuk mengalu-alukan penglibatan lebih banyak syarikat korporat bagi menjadikan inisiatif Tanggungjawab Sosial Korporat (CSR) mereka sebagai jambatan penghubung dasar kerajaan. Kerjasama ini penting dalam membina masyarakat yang lebih berinformasi dan progresif terhadap isu alam sekitar.

"Usaha kecil di peringkat komuniti mampu membawa impak besar terhadap pengurangan pelepasan karbon dan kelestarian alam secara menyeluruh," katanya lagi.

Turut hadir, Pengerusi MGTC, Shareen Shariza Dato' Abdul Ghani, Ketua Pegawai Eksekutif Kumpulan Bateriku (M) Sdn Bhd, Azarol Faizi, Presiden Friends of Langat River, Dato' Seri Ir. Dr. Zaini Ujang, Nazir MAsjid Al Hasanah, Ustaz Mohd Safian.

KEMENTERIAN SUMBER ASLI DAN KELESTARIAN ALAM (NRES)
8 FEBRUARI 2026



Unit Komunikasi Korporat | Kementerian Sumber Asli dan Kelestarian Alam (NRES)
Tel. : 03-8000 8000 | Faks : 03-8889 4763

 nresmalaysia